

新唐书纠谬
[标点本]

吴缜

文硕阁

wenshuoge.com

目录

关于我们	3
原序	5
进新唐书纠谬原表	7
卷01	8
卷05	11
卷08	16
卷10	17
卷13	24
卷15	26
卷16	28
卷18	30
卷19	31
跋	35

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

原序

史才之难尚矣，游、夏，圣门之高弟，而不能赞《春秋》一辞。自秦汉迄今千数百岁，若司马迁、班固、陈寿、范蔚宗者，方其著书之时，岂不欲曲尽其善，而传之无穷，然终亦未免后人之诋斥。至唐独称刘知几，能于修史之外，毅然奋笔，自为一书，贯穿古今，讥评前载。观其以史自命之意，殆以为古今绝伦，及取其尝所论著，而考其谬戾，则亦无异于前人，由是言之，史才之难，岂不信哉！必也编次事实，详略取舍，褒贬文采，莫不适当，稽诸前人而不谬，传之后世而无疑，粲然如日星之明，符节之合，使后学观之，而莫敢轻议，然后可以号信史，反是，则篇帙愈多而讥讪愈众，奈天下后世何。我宋之兴，一祖五宗，重熙累洽，尊儒敬道，储思艺文，日以崇广学校，修纂文史为事，故名臣缀缉不绝于时，前朝旧史，如《唐书》洎《五代实录》皆已修为新书，颁于天下。其间惟《唐书》自颁行迄今，几三十载，学者传习，与迁、固诸史均焉。缜以愚昧，从公之隙，窃尝寻阅新书，间有未通，则必反复参究，或舛驳脱谬，则笔而记之，岁时稍久，事日益众，深怪此书抵牾穿穴，亦已太甚，揆之前史，皆未有如是者。推本厥咎，盖修书之初，其失有八：一曰责任不专、二曰课程不立、三曰初无义例、四曰终无审覆、五曰多采小说，而不精择、六曰务因旧文，而不推考、七曰刊修者不知刊修之要，而各徇私好、八曰校勘者不举校勘之职，而惟务苟容。何谓责任不专？夫古之修史，多出一家，故司马迁、班固、姚思廉、李延寿之徒，皆父子论撰数十年方成，故通知始末，而事实贯穿不抵牾也。惟后汉东观群儒，纂述无统，而前史讥之。况夫唐之为国几三百年，其记事亦已众矣，其为功亦已大矣，斯可谓一朝之大典，举以委人而不专其责，则宜其功之不立也！今《唐史》本一书也，而纪志表则欧阳公主之，传则宋公主之，所主既异，而不务通知其事，故纪有失而传不知，如胶东郡公道彦等纪书降封县公而传乃郡公之类，传有误而纪不见，如《朱宣传》叙天平节度使止有四人，而纪则有七人之类，岂非责任不专之故欤。何谓课程不立？夫修一朝之史，其事匪轻，若不限以岁月，责其课程，则未见其可。尝闻修《唐书》，自建局至印行罢局，几二十年，修书官初无定员，皆兼莅它务，或出领外官，其书既无期会，得以安衍自肆，苟度岁月，如是者将十五年，而书犹未有绪，暨朝廷讶其淹久，屡加督促，往往遣使就官所取之，于是乃仓猝牵课，以书来上，然则是书之不能完整，又何足怪，岂非课程不立之故欤。何谓初无义例？夫史之义例，犹网之有纲，而匠之绳墨也。故唐修《晋书》，而敬播、令狐德棻之徒先为定例，盖义例既定，则一史之内，凡秉笔者，皆遵用之，其取舍详略，褒贬是非，必使后人皆有考焉。今之新书则不然，取彼例以较此例则不同，取前传以比后传则不合，详略不一，如中宗纪前与诸帝纪不同，诸帝纪亦自详略不同之类，去取未明，如皇太子改名并诞节名及上寿皆不书，而上尊号则书之类，一史之内，为体各殊，岂非初无义例之故欤。何谓终无审覆？方新书来上之初，若朝廷付之有司，委官覆定，使诘难纠驳，审定刊修，然后下朝臣博议，可与未可，施用如此，则初脩者必不敢灭裂，审覆者亦不敢依违，庶乎得为完书，可以传久。今其书颁行已久，而疏谬舛驳，于今始见，岂非终无审覆之故欤。何谓多采小说，而不精择？盖唐人小说，类多虚诞，而修书之初，

但期博取，故其所载，或全篇乖舛，如代宗母吴皇后传之类，岂非多采小说而不精择之故欤。何谓务因旧文，而不推考？夫唐之史臣，书事任情者多矣，如吴兢书魏齐公事，可以推知，当日史臣，书事与夺，止在其笔端，又如辛云京自立，而传止称其朝命，李德裕执政，增修其父吉甫美事之类，安可悉依徇而书。今之新书，乃殊不参较，但循旧而已，故其失与唐之史臣无异，如太宗放死囚三百九十人、义阳宣城公主四十不嫁之类，岂非务因旧文，而不推考之故欤。何谓刊修者不知刊修之要，而各徇私好？夫为史之要有三，一曰事实、二曰褒贬、三曰文采，有是事而如是书，斯谓事实；因事实而寓惩劝，斯谓褒贬；事实褒贬既得矣，必资文采以行之，夫然后成史。至于事得其实矣，而褒贬文采则阙焉，虽未能成书，犹不失为史之意。若乃事实未明，而徒以褒贬文采为事，则是既不成书而又失为史之意矣。新书之病，正在于此。其始也不考其虚实有无，不校其彼此同异，修纪志者，则专以褒贬笔削自任；修传者，则独以文辞华采为先，不相通知，各从所好，其终也遂合为一书而上之，故今之新书，其间或举以相校，则往往不啻白黑方圆之不同是，盖不考事实，不相通知之所致也，斯岂非刊修者不知其要，而各徇私好之故欤。何谓校勘者不举校勘之职，而惟务苟容？方新书之来上也，朝廷付裴煜、陈荐文同吴申钱藻，使之校勘，夫以三百年一朝之史，而又修之几二十年，将以垂示万世，则朝廷之意岂徒然哉！若校勘者，止于执卷唱读，案文讎对，则是二三胥吏足办其事，何假文馆之士乎！然则朝廷委属之意重矣，受其书而校勘者，安可不思，必也讨论击难，刊削缮完，使成一家之书，乃称校勘之职；而五人者，曾不闻有所建明，但循故袭，常惟务暗嘿，致其间讹文谬事，历历具存，自是之后，遂颁之天下矣，岂非校勘者不举其职，而惟务苟容之故欤。职是八失，故新书不能全美以称朝廷纂修之意，愚每感愤叹息，以为必再加刊修，乃可贻后，况方从宦巴峡，僻陋寡闻，无他异书可以考证，止以本史，自相质正，已见其然。意谓若广以它书校之，则其穿穴破碎，又当不止此而已也。所记事条丛杂无次，艰于检阅，方解秩还朝，舟中无事，因取其相类者，略加整比，离为二十门，列之如左，名曰《新唐书纠谬》，谓撙举其谬误而已，肤浅之见，乌足贻之同志，姑投之巾笥，以便寻绎而备遗忘云。

咸林吴缙序

进新唐书纠谬原表

臣缙言：准尚书省札子节文，资政殿学士、太中大夫、守吏部尚书兼侍读胡宗愈奏，“昨蒙恩命，侍读还英。窃虑将来当次读《唐书》。按，《新唐书》乃欧阳脩、宋祁据旧史所撰，脩与祁皆当世名儒，所撰《唐书》，亦杂采诸家异说，脩撰帝纪、表、志，而祁为列传。各据所闻，商略不同，故其所书事迹，详略先后，不免或有差误。窃见左朝散郎、前知蜀州吴缙撰成《新唐书正谬》，分二十门，是正差误。伏望圣慈指挥下本官，令缮写进呈。取进止。”三省同奉圣旨，许脩写投进者。唐家新史，久模印以颁行；蜀地鳬生，忽著书而窃议。还臣建请，睿旨俯从。祇奉诏文，伏深兢惕，臣缙诚惶诚惧顿首。

臣窃惟唐室最近圣朝，著纪者将三百年，传世者凡二十帝。其国家兴衰之迹，及君臣治乱之端，贤人君子功名德业之□成，元恶大奸祸败破亡之明鉴，简编丛伙，淑慝混淆，讫于末年，未有完史。暨五季天福之际，有大臣赵莹之徒缀缉旧闻，次序实录，草创卷帙，粗兴规摹，仅能终篇，聊可备数。斯盖时异光华之旦，人非宏杰之才，辞采不足以发挥幽潜，书法不足以耸动观听，纪述取舍，乖戾舛差。我仁宗皇帝所以临文咨嗟，当宁感叹，思成书于盛际，冀垂宪于永年，申命名儒，博招时彦，访朝绅之撰述，发策府之秘藏，无使逸遗，悉归采掇。讨论润色，积十有七年；删削增多，成二百餘卷。然而篇第浩博，事条猥并，刊脩之官既分，編集之员不一，好尚各异，责任靡专。记事止于笔端，定论出于言下，曾不参考，了无适从。善恶多相异之辞，纪、传有不同之事，虚实详略，年月姓名，阙漏复重，抵牾驳杂。既布传之已久，但习用而莫知。臣虽至愚，常切私愤，从吏之暇，披卷以寻。岁月寢深，瑕纇愈见。恭惟仁祖，可谓圣时，集当世之名臣，成前朝之大典，期示万载，自为一家，岂容方来复有异论？臣是以夙夕兴念，启处不遑，欲昧死以开陈，愿据文而刊正。方将具稿，已睹奏封。敢谓皇帝陛下曲赐允从，许令写进。纶言炳耀，责私室以生光；管见迂疏，渎宸聪而增惧。自量不韪，难追严诛，仰丐睿慈，特垂矜贷。其上件文字，初名《新唐书正谬》，寻以未尝刊正，止是纠擿谬误而已，遂改为《新唐书纠谬》。凡二十门，为二十卷。已脩写了毕，谨随表附递，上进以闻。臣缙诚惶诚惧，顿首顿首，谨言。绍圣元年九月日，左朝请郎、前知蜀州军州事、臣吴缙上表。

卷01

《肃宗章敬吴皇后传》云：“后幼入掖廷，肃宗在东宫，宰相李林甫阴谋不测，太子内忧，鬓发班秃，后入谒，玄宗见不悦，因幸其宫，顾廷宇不汛扫，乐器尘蠹，左右无嫔侍，帝愀然谓高力士曰：‘儿居处乃尔，将军叵使我知乎？’诏选京兆良家子五人，虞侍太子，力士曰：‘京兆料择，人得以借口，不如取掖廷衣冠子，可乎？’诏可，得三人，而后在中。因蒙幸，忽寝厌不寤，太子问之，辞曰：‘梦神降我，介而剑，决我胁以入，殆不能堪。’烛至，其文尚隐然。生代宗为嫡皇孙，生之三日，帝临澡之，孙体孱弱，负姆嫌陋，更取他宫儿以进，帝视之不乐，姆叩头言非是，帝曰：‘非尔所知，趣取儿来！’于是见嫡孙，帝大喜，向日视之，曰：‘福过其父！’帝还，尽留内乐宴具，顾力士曰：‘可与太子饮，一日见三天子，乐哉！’后性谦柔太子礼之甚渥。”

今案《本纪》，代宗以大历十四年崩，时年五十三，是岁己未，推其生年，实开元十五年，丁卯岁，而李林甫以开元二十年方为宰相，且案林甫本传，其未为相之前，亦无谋不测以倾东宫之事，此其证一也。又案开元十五年，太子瑛尚居东宫，至二十五年，瑛始废，二十六年六月，肃宗方为太子，是岁戊寅，则代宗已年十二矣，此其证二也。且肃宗既为太子，其宫室之内，汛扫廷宇，整饬乐器，宜各有典司，玄宗既临幸其宫，则主者当扫洒整饬以为备豫，岂有乘舆方至，而有司恬然不加严飭除治以俟之者乎？就如肃宗诚忧林甫构扇不测，则怀危惧，不过中自隐忧而已，何豫于掌洒扫、典乐器之人而亦不举其职欤？此其证三也。代宗既于玄宗为嫡长孙，而又生之三日，玄宗亲临澡之，其事体亦已不轻，彼负姆者遽敢率尔取它儿易之，上欺人主，下易皇孙？静寻其言，有同戏剧，虽人臣之家，亦不至是，况至尊之前乎？此其证四也。由是言之，则《吴后传》中所言虚谬可见，盖出于传闻小说，增饰之言，不足取信于后世也。

《李吉甫传》云：“迁中书舍人。刘辟拒命，帝意讨之未决，吉甫独请无置，宜绝朝贡以折奸谋。……高崇文围鹿头未下，严砺请出并州兵，与崇文趋果、阆，以攻渝、合，吉甫以为非是……请起宣、洪、蕲、鄂强弩兵，捣三峡之虚……崇文惧舟师成功，人有鬪志。帝从之……由是崇文悉力，刘辟平，吉甫谋居多。”

今案《杜黄裳传》云：“刘辟叛……唯黄裳固劝不赦。”又《严绶传》云：“刘辟叛，绶建言：‘天子始即位，不可失威，请必诛。’”由是言之，刘辟之叛，杜黄裳、严绶亦皆请必诛，非独吉甫请无置，此其证一也。又《严绶传》云绶为河东节度使，刘辟反，绶请“选锐兵，遣大将李光颜助讨贼。”平之。又《高崇文传》云崇文讨刘辟，“西自阆中出，郤剑门兵，解梓潼之围……鹿头山，南距成都一百五十里，扼二川之要，辟城之，旁连八屯，以拒东兵。崇文破贼于城下……明日，战万胜堆，堆直鹿头左，使骁将募死士夺而有之，下瞰鹿头城，凡八战皆捷，贼心始摇。大将阿跌光颜【即李光颜也】……后期惧罪，请深入自赎，乃军鹿头西，断贼

粮道。贼大震，其将……仇良辅举鹿头城降……遂趣成都，辟走，追禽之。”又案《严砺传》，刘辟反，时砺为山南节度使，今《吉甫传》乃云“崇文围鹿头未下，严砺请出并州兵”，且鹿头距成都止一百五十里，并州之兵与李光颜是时已皆在其行久矣，今乃始云“围鹿头未下，严砺请出并州兵”，无乃太后时欤？此其证二也。且《严绶传》自刘辟初反，绶即建请自河东选兵遣将助讨贼，今此乃以为山南节度使严砺，即其误可知，此其证三也。且鹿头之距成都才一百五十里，而果、阆、渝、合，皆在成都五七百里之外，今崇文既已围鹿头，则其城乃必争之地，而贼方危破之秋，是不可缓顷刻而退尺寸之际也，今乃云崇文“围鹿头未下，砺请出并州兵，与崇文趋果、阆，以攻渝、合”，如此则是鹿头将拔，贼势已败，而砺乃始建请出并州兵，吉甫方欲起宣、洪、蕲、鄂强弩，不唯其时日已太迟缓乖牾，而其所指又皆舍近而之远，殊非兵家攻取之要，此昭然可见其谬，其证四也。吉甫既以起并州兵入蜀为非是，而请起宣、洪、蕲、鄂强弩兵，捣三峡之虚，使崇文惧舟师有功而悉力，然案诸人传，则并州之兵，自初伐叛，即与崇文偕至，卒以成功，而宣、洪、蕲、鄂之兵，不闻有自三峡进者，而辟亦就禽然，则吉甫所谋，竟无毫发之效，其证五也。案《杜黄裳传》云：“刘辟叛……唯黄裳固劝不赦……专委高崇文。凡兵进退，黄裳自中指授，无不切于机。崇文素惮刘潼，黄裳使人谓曰：‘公不奋命者，当以潼代。’崇文惧，一死力缚贼以献。蜀平，群臣贺，宪宗目黄裳曰：‘时卿之功。’”由此言之，平刘辟者，实黄裳之力，今反归功于吉甫，此其证六也。夫黄裳以宰相而当伐叛之任，书之其传固其宜矣，而吉甫以一中书舍人，乃欲多有其功，就使其实，且犹未可，而况于虚乎！然则此吉甫数事，本皆无有，而今史之所述如是者非它，盖其子德裕秉政日，尝重修《宪宗实录》故吉甫之美恶，皆增损而不实，若此之事，乃重修之时，史官求书吉甫之美而不可得，于是窃取黄裳之事，依仿而为之尔。故其事大抵相类，然不顾其间参错抵牾，考其实则无有，今新《书》又因以为实而书之，无所刊正，岂朝廷重修之意哉！

《刘兰传》：“贞观十一年，为夏州都督长史，时突厥携贰，郁射设阿史那模末率属帐居河南，兰纵反间离之，颉利果疑，模末惧，来降，颉利急追，兰逆拒却其众。”

今案《太宗纪》：“贞观四年……三月甲午，李靖俘突厥颉利可汗以献”。又《突厥传》：“贞观八年，颉利死”于京师矣。今《刘兰》乃谓贞观十一年颉利尚存于本国；且又考突厥本传，亦无模末来降而颉利急追，刘兰拒却之事，此可验其事皆虚也。

《马璘传》云：“从李光弼攻洛阳，史朝义众十万阵北邙山，旗铠照日，诸将犹疑，未敢击，璘率部士五百薄贼屯，出入三反，众披靡，乘之，贼遂溃。光弼曰：‘吾用兵三十年，未见以少击众，雄捷如马将军者！’”

今案李光弼及史思明传，邙山之战，思明主其军，非朝义也，此其误一也。又案《

帝纪》：“上元二年，二月……戊寅，光弼与思明战，败绩”，而《光弼传》亦云官军大溃，则此安得有贼遂溃之谓哉？此其误二也。此盖《马璘传》一偏之说，夸大其功，若考其实，则虚谬自见矣。

《裴守真传》云：“子：子馀……耀卿、巨卿，别有传。”；《昭成窦皇后传》云：“曾祖：抗、父：孝湛，自有传。”

今案裴耀卿、窦抗则已有传，而巨卿、孝湛则无之。

卷05

《韦弘景传》云：“迁给事中。驸马都尉刘士泾赂权近，擢太仆卿。弘景上还诏书，穆宗使喻其先人昌有功，朕所以念功睦亲者。弘景固执。帝怒，使宣慰安南，由是有名。”今案《刘士泾传》云：“迁太仆卿。给事中韦弘景等封还制书，以士泾交通近幸，不当居九卿。宪宗曰：‘昌有功于边，士泾又尚主官少卿已十馀年，制书宜下’。弘景等乃奉诏。”此二传一以为穆宗，一以为宪宗，一则云弘景固执帝怒，使宣慰安南，一则云弘景等乃奉诏。二说殊不同，未知其孰是。且又《士泾传》云：“弘景等即不知馀人为谁”此皆舛误之甚者也。

《魏谟传》云：“大中十五年，以平章事领剑南西川节度使。”今案《宣宗纪》，大中十一年二月辛巳，魏谟罢。又《宰相表》云：“大中十一年二月辛巳，谟为检校户部尚书、平章事、西川节度使。”二者不同，或者本传以为十五年者误欤？

《李诉传》云：“于时元和十一年十月己卯，师夜起，黎明雪止。诉入驻元济外宅，蔡吏惊曰：‘城陷矣’。元济请罪，梯而下，槛送京师。”今案《宪宗纪》，元和十二年十月癸酉，克蔡州。又韩愈《平蔡碑》云：“十二年八月，丞相度至师。十月壬申，诉用所得贼将，自文城因天大雪，疾驰百二十里。用夜半到蔡，破其门，取元济以献。”然则《宪宗纪》《新书》正得其实，而《诉传》以为元和十一年十月己卯，则大误矣。

《阎立本传》云：“咸亨元年，官复旧名，改中书令，卒。”【立本初以总章元年为右相，本中书令也。】今案《宰相表》，则咸亨二年立本方为中书令，未知孰是。

《杨贵妃传》云：“开元二十四年，武惠妃薨。”今案《玄宗纪》：“开元二十五年，四月乙丑，废皇太子瑛及鄂王瑶、光王琚为庶人，皆杀之。十二月丙午，惠妃武氏薨。”又案《惠妃传》及庶人瑛等，先死而后薨。既瑛等皆二十五年死，则妃之薨无由却在二十四年，其理甚明。然则《杨贵妃传》所云差一年矣。

《王志愔传》云：“开元九年，帝幸东都，诏留守京师。京兆人权梁山妄称襄王子谋反。”今案《玄宗纪》，开元九年并无幸东都之事，而十年正月丁巳如东都。九月，京兆人权梁山反，伏诛。志愔传所云九年者，误也。

《王求礼传》云：“久视二年三月，大雨雪。”今案《本纪》，久视止有元年，至次年正月丁丑改元大足，至十月改元长安，则是久视无二年三月矣。且又案《本纪》及《五行志》，长安元年三月亦无大雨雪，止是《五行志》云：“久视元年三月，大雪。”疑《求礼传》所云即此事，而误以元年为二年尔。

《张柬之传》云：“长安中，武后谓狄仁杰曰：‘安得一奇士用之？’”今案《本纪》及《狄仁杰传》，仁杰以圣历三年九月薨，是年岁在庚子，【即久视元年也。】而长安元年岁在辛丑。由是言之，《柬之传》云长安中，必误也。

《岑羲传》云：“迁秘书少监，进吏部侍郎。帝崩，诏擢右散骑常侍、同中书门下三品。睿宗立，罢为陕州刺史，再迁户部尚书。景云初，复召同三品。”今案《睿宗纪》云：“景云元年六月壬午，韦皇后弑中宗，矫诏立温王重茂为皇太子。以刑部尚书裴谈、工部尚书张锡同中书门下三品；吏部尚书张嘉福、中书侍郎岑羲、吏部侍郎崔湜同中书门下平章事。”《宰相表》亦同。即无中宗崩，而羲以右常侍为同三品之事。六月甲辰，睿宗即位。至七月丁巳，羲罢为右散骑常侍。先天元年正月，以户部尚书始同三品，盖自景云元年【即景龙四年庚戌岁也】六月温王即位，改元唐隆。是月睿宗即位，己巳大赦，改元景云。至二年【辛亥】，先天元年【壬子】正月，羲始为同三品。然则非景云初，乃先天初也。纪及表又云“羲曾为中书侍郎”，而本传无之，亦脱漏也。

《窦怀贞传》云：“俄与李日知、郭元振、张说皆罢为左御史大夫，逾年复同中书门下三品。”今案《睿宗纪》，景云二年【辛亥】十月，窦怀贞罢。先天元年【壬子】正月乙未，左御史大夫窦怀贞同中书门下三品。则是止三数月耳，非逾年也。或曰，史家止谓改岁则为逾年，非谓过一期也。愚曰：唯《新书》之例不然，故不得不疑而辨之。案《杜元颖传》谓穆宗即位不阅岁，而元颖至宰相。且穆宗以元和十五年闰正月即位，次年长庆元年二月元颖入相，斯亦可谓逾年矣。而本传以为不阅岁，又云“甫再期，出为西川节度使”，盖谓仅及二周，而元颖以长庆元年二月为相，至三年十月罢，凡二周岁，馀八月，而本传以为“甫再期”今窦怀贞自罢相至复同三品，虽曰“改岁”而止三四月，又安得遂以为逾年哉？

《常山王承乾传》云：“贞观十七年，废为庶人，徙黔州，十九年死。”今案《本纪》，贞观十八年十二月壬寅，庶人承乾卒，与本传差一年。

《宪宗纪》元和四年闰三月：“丁卯，立邓王宁为皇太子。”【即惠昭太子也】；六年十二月：“辛亥，皇太子薨。”今案《穆宗纪》云：“元和七年，惠昭太子薨。”而《惠昭太子传》云：“李絳等建言立皇太子。帝曰：‘善’。以宁为皇太子。册礼用孟夏雨不克。改用孟秋，亦雨，冬十月，克行礼。明年薨，年十九。”以是推之，《宪宗纪》，惠昭以元和四年立，六年十二月薨，而《穆宗纪》云“元和七年薨”，已为舛错。今《惠昭本传》又云“冬十月，克行礼，明年薨”，则是元和四年受册成礼，而五年薨，愈见乖异，不知何者为是。然要之，李絳尝上言曰：“陛下受命四年，而冢子未建，于是乃立太子。”则是元和四年立之无疑。但薨年则纪传交互，为难考尔。

《孝敬皇帝传》云：“弘奏请数佛旨。上元二年，从幸合璧宫，遇鸩薨，年二十四

。”又《高宗纪》：“上元二年四月己亥，天后杀皇太子。五月戊申，追号皇太子为孝敬皇帝。今案《燕王忠传》云：“王皇后废武后子弘，甫三岁。”又《高宗纪》：“永徽六年十月己酉，废皇后为庶人”。是岁乙卯，而弘三岁，则是以癸丑生，至上元二年岁在乙亥，薨止是二十三年，不得云“二十四”也。

《章懷太子传》云：“上元元年，复名贤。”是时皇太子薨，其六月，立贤为太子。今案《高宗纪》及《三宗诸子传》并云皇太子以上元二年薨，独此传以为元年，盖误也。

《十一宗诸子传》云：“奉天皇帝琮· · · · · ·天宝元年，改节河东。十载薨· · · · · ·”【琮本封庆王】今案《玄宗纪》云：“天宝十一载，五月戊申，庆王琮薨。”恐本传之误也。

《张浚传》云：“迁左仆射致仕，居洛长水墅。王师范起兵青州，欲取浚为谋主，不克。全忠肱帝东迁，浚闻曰：‘乘舆卜洛，则大事去矣’。盖知其将篡也。全忠畏浚，构它镇兵，使张全义遣牙将如盗者，夜围墅，杀之，屠其家”，实天复二年十二月【是岁壬戌】。今案《昭宗纪》，天复元年【辛酉】十月，朱全忠犯京师。十一月壬子，昭宗如鳳翔。戊辰，全忠犯鳳翔。自是全忠围鳳翔至天复三年【癸亥】正月，王师范取兗州。甲子，昭宗幸全忠军。己巳，昭宗至自鳳翔。十二月丙申，朱全忠杀尚书左仆射致仕张浚。由此观之，则天复二年十二月，昭宗尚在岐下，为全忠所围未出，亦未有卜洛之事，王师范亦未起兵。然则《本纪》所书三年十二月丙申杀浚，为得其实，而本传云二年十二月者，误也。且又浚以三年既死，而昭宗以四年迁洛。今观《浚传》所书，则似迁洛之后，浚方被杀，此盖传中文。

《肃王详传》云：“建中二年薨。”今案《德宗纪》：“建中三年十月丙子，肃王详薨。”与传差一年。

《武攸暨传》云：“天授巾，自千乘郡王进封定王。长安中，降王寿春。中宗时，拜司徒，复王定。”今案《武承嗣传》云：“中宗复位，侍中敬晖等言诸武不当王，帝柔昏不断，才降封一级。三思王德静郡攸暨寿春。”然则攸暨之降王寿春，乃中宗神龙时事也。而传以为长安中，则误矣。

《儒学啖助传》赞云：“呜呼！孔子没乃数千年。”今案孔子以鲁哀公十六年壬戌岁卒，距嘉祐五年庚子进新书之岁，止一千五百三十九年。又案啖助以大历五年庚戌岁卒，止距孔子之卒，才一千二百四十九年。今乃云孔子没数千年，无乃误欤？

《懿德太子重润传》云：“大足中，张易之兄弟得幸武后，或潜重润与其女弟永泰郡主及主婿窃议，后怒，杖杀之，年十九。”今案《重润传》首云：“重润生，高

宗喜甚，乳月满，为大赦天下，改元永淳。”而是年岁在壬午。大足止有元年，岁在辛丑，则是重润年二十，谓之十九，则误也。

《上官昭容传》云：“西台侍郎仪之孙，父廷芝，与仪死武后时。”今案《上官仪传》云：“麟德元年，坐梁王忠事下狱死，子廷芝亦被杀。”又《本纪》麟德元年：“十二月丙戌，杀上官仪。”《武后传》云：“麟德初，后召方士为蛊，宦人发之。帝怒，召上官仪草诏废后。后讽许敬宗构仪杀之。”然则武后以麟德元年造蛊，是年杀仪。方是时，高宗尚亲政，武后止居中宫，后二十年方有临朝称制事，则当麟德初，不得谓之“武后时”也。

《江夏王道宗传》：“高宗永徽初，房遗爱以反诛。长孙无忌、褚遂良与道宗有宿怨，诬与遗爱善，流象州，道病薨，年五十四。”今案道宗本传云：“裴寂与刘武周战度索原，寂败，贼逼河东，道宗年十七，从秦王讨贼。”且裴寂与刘武周度索原之战，即武德二年九月介州姜宝谊死之之战是也。【此战见于《裴寂》《姜宝谊》《刘武周传》《高祖本纪》武德二年中】，是年岁在己卯，时道宗年十七，则是生于隋仁寿三年癸亥岁也。而房遗爱之诛，在永徽四年癸丑岁，自癸亥至癸丑，正五十一年尔，不得云年五十四也。

《突厥传》云：“武德四年，颉利率万骑与苑君璋合，寇雁门，执我使者。帝亦囚其使与相当。由是寇代州，败行军总管永安王孝基。”今案《永安王孝基传》云：“武德二年，刘武周寇太原，夏人吕崇茂以县应贼，诏孝基为行军总管攻之，工部尚书独孤怀恩、内史侍郎唐俭、陕州总管于筠隶焉……会尉迟敬德至，与崇茂夹官师，遂大败。孝基及筠等皆执于贼，谋亡归，为贼所害……晋阳平，购尸不获。”又案《本纪》武德二年十月：“壬戌，刘武周寇晋州，永安王孝基及工部尚书独孤怀恩、陕州总管于筠、内史侍郎唐俭讨之。是月，夏县人吕崇茂反。十二月，永安王孝基及刘武周战于下邳，败绩【此乃“战于夏县”，而误作“下邳”，已有说见别篇。又孝基及于筠等四人被执，正在此战，而纪漏书，亦见别篇。】……三年二月甲寅，独孤怀恩谋反，伏诛。【案《怀恩传》：“怀恩初谋反，而敕令讨武周，既而四人败，被执。俄而秦王破武周于美良川，怀恩逃归，而谋反事败，遂伏诛。”】四月壬戌，秦王世民及刘武周战于洺州，败之。武周亡入于突厥，克并州。”由是言之，永安王孝基在武德三年四月，刘武周末破败之前已被害矣，何缘四年犹为行军总管，而与突厥战乎？此盖误也。

《太宗纪》云：“武德元年，薛举寇泾州，太宗为西讨元帅。七月，太宗有疾，诸将为举所败。八月，太宗疾间，复屯于高塘城，相持六十馀日。已而举死，其子仁杲率其众求战，太宗按军不动。久之，仁杲粮尽，太宗曰：‘可矣’乃遣总管梁实柵浅水原，仁杲将宗罗睺击实，太宗率兵出其后，罗睺败走，太宗追之，至其城下，仁杲乃出降。”今案《高祖纪》武德元年：“六月癸未，薛举寇泾州，秦王世民为西讨元帅。七月壬子，刘文静及薛举战于泾州，败绩。八月辛巳，薛举卒。己丑

，秦王世民为西讨元帅，以讨薛仁杲。十一月己酉，秦王世民败，薛仁杲，执之。”然则薛举以六月癸未寇涇州，至八月辛巳卒，共五十九日耳。若自七月壬子举败刘文静后，至八月辛巳止三十日耳。今《本纪》乃云“八月，太宗疾间，复屯于高塘城，相持六十馀日，已而举死。”参较《高纪》前后，无复有与举相持可及六十馀日之处。

《吐谷浑传》云：“其王慕容伏允拘天子行人赵德楷，贞观九年，诏李靖等为西海道行军大总管击之。”今案《本纪》，其吐谷浑执赵德楷，及命李靖等六总管伐之，皆贞观八年十二月事，非九年也。

卷08

《杨慎矜传》云：“父隆礼，历州刺史，善检督吏，以严办自名。开元初，为太府卿，任职二十年，年九十馀，以户部尚书致仕卒。”今案《宰相世系表》，载“隆礼”为“崇礼”，此盖隆礼以开元时避明皇帝讳，以崇易隆，理亦当然。而史家遗落其事，止书旧名，此其失也。或者谓此乃史之小疵，亦不足云。愚以为不然。夫史之作，岂独止于劝惩而已哉？其笔削取舍，必使后世有考焉。方开元时，君父即名隆矣，为臣子者亦名隆，而无所迁避，岂尊君严上之谓哉！今隆礼既尝易名，而史不载，使后世不知者，或归罪于隆礼，或遂援之以为说，此实史氏之深责，岂止小疵而已哉！况韦思谦尝避讳而以字行，王绍、陆质亦尝避讳改名，而史皆载于传。以例言之，则隆礼之传，其失昭然矣。

《礼乐志》云：“千秋节者，玄宗以八月五日生，因以其日名节，而君臣共为荒乐。当时流俗多传其事以为盛，其后巨盗起，陷两京，自此天下用兵不息，而离宫苑囿，遂以荒堙，独其馀声遗曲传人间，闻者为之悲凉感动。”盖其事适足为戒，而不足考法，故不复著其详。自肃宗以后，皆以生日为节，而德宗不立节，然止于群臣称觞上寿而已。今案《唐会要》云：“开元十七年八月五日，左丞相源乾曜、右丞相张说等表，请以是日为千秋节，著之甲令，群臣常以是日献万寿酒。”又宪宗元和十五年七月诏云：“朕诞辰奉迎皇太后宫中上寿。”又文宗太和七年庆成节，是日，上于宫中奉迎皇太后，宴乐，群臣，诣延英门上寿。是盖人主因其诞辰，感其亲生育劬劳之恩，不敢同之常日，于是为之宴乐，以致其爱敬之心焉。

为臣子者，又喜其君父生于是日，愿其享无疆之祚，亦相率奉觞献寿，以致其祝延之诚焉。是皆出于臣子之情，而饰以礼文，故后世不可得而废者也。是以累朝沿袭，未之有改。且上寿之礼尚矣，古人每有吉庆喜乐之事，则上寿于君亲，以致其诚意。《经》所谓“称彼兕觥。万寿无疆。”则其比也。如汉高祖、车千秋、东方朔止偶因一事，而犹且为之，况当君亲诞育之日，臣子若恬如平时，不少致其诚敬，则人情礼意，其可安乎？由是言之，因诞日立节名，上寿酒，亦臣子奉君亲之礼耳，未可遽削而不著也。且天宝之乱，盗起兵兴，而唐遂衰，其所以召之者，盖有由矣。刑政垂戾而任用匪人也，非以立千秋节也。使当时不立节名，不上寿、不宴乐，亦未免乎盗起而唐衰也。其后肃宗，文宗以至武、宣、懿、僖、昭、哀八朝，各尝立诞节，名亦不闻其召乱迨，其亡也，亦不自诞节起。然则史之所书，使后世可以为戒者，在乎刑政之得失，任用之贤否尔。立诞节而上寿宴乐，以致臣子之情礼者，非所以为戒也。徒使后世有司欲考按故事，则返区区乎求之于他书，是未可谓善为史者也。又按《唐会要》，自肃宗以后，有代、德、顺、宪、穆、敬，六朝皆不立诞节名。今《志》以为独德宗不立，亦未知其孰是。

今案裴耀卿，守真之子也。而《耀卿传》居第五十二卷，《守真传》居第五十四卷，次序如此，于义无乃未安欤？

卷10

《肃宗纪》云：“朔方留后支度副使杜鸿渐、六城水陆运使魏少游、节度判官崔漪、支度判官崔简金、闕内盐池判官李涵、河西行军司马裴冕迎太子治兵于朔方。”今按《裴冕传》云：“河西节度使哥舒翰辟行军司马。玄宗入蜀，诏皇太子为天下兵马元帅，拜冕御史中丞兼左庶子副之。初，冕在河西，方召还，而道遇太子平凉，遂从至灵武，与杜鸿渐、崔漪同辞，进曰：‘主上厌于勤，且南狩蜀，宗社神器，要须有归。今天意人事，属在殿下，宜正位号。有如逡巡，失亿兆心，则大事去矣。’太子曰：‘我平寇逆，奉迎乘舆还京师，退居储贰，以侍膳左右，岂不乐哉！公等何言之过！’对曰：‘殿下居东宫二十年，今多难启圣，以安社稷，而所从将士皆闕辅人，日夜思归，大众一骚，不可复集，不如因而抚之，以就大功，臣等昧死请。’太子固让，凡五请，卒见听，太子即位。”又《杜鸿渐传》云：“安思顺表为朔方判官。禄山乱，皇太子按军平凉，未知所适，议出萧闕趣丰安。鸿渐与六城水陆运使魏少游、节度判官崔漪、支度判官卢简金、闕内盐池判官李涵谋曰：‘刘、石乱常，二京覆没，太子治兵平凉，然散地难恃也。今朔方制胜之会，若奉迎太子，西诏河、陇，北结回纥，回纥与国，收其劲骑，与大兵合鼓而南，雪社稷之耻，不亦易乎！’即具上兵马招辑之势，录军资、库器械、储廩凡最，使涵诣平凉见太子，太子大悦。会裴冕至自河西，亦劝之朔方，而鸿渐与漪至白草顿迎谒说曰：‘朔方天下劲兵，灵州用武地。今回纥请和，吐蕃结附天下，列城坚守，以待王命，纵为贼据，日夜望官军以图收复。殿下治兵长驱逆胡不足灭也。’太子喜曰：‘灵武我之闕中，卿乃吾萧何也。’既至灵武，鸿渐即与冕等劝即皇帝位，以系中外望。六请，见听。”又《魏少游传》云：“累迁朔方水陆转运副使。”考此数传，杜鸿渐止为朔方判官，而《纪》云朔方留后支度副使。魏少游本为水陆转运副使，而《纪》云六城水陆运使。《鸿渐传》又云，六城水运使裴冕，以河西行军司马，已拜御史中丞，兼左庶子，为天下兵马副元帅，赴召而还。而《纪》止云河西行军司马，此位号不同也。《鸿渐传》云，支度判官卢简金，而《纪》云崔简金，此姓不同也。《裴冕传》云五请，而《鸿渐传》云六请，此劝进之数不同也。

《李岷传》云：“凤翔七马坊押官盗掠人，天兴令谢夷甫杀之。李辅国讽其妻使诉枉，诏监察御史孙莹鞫之，直夷甫。其妻又诉，诏御史中丞崔伯阳、刑部侍郎李晔、大理卿权献为三司讯之，无异辞。妻不承，辅国助之，乃令侍御史毛若虚覆按，若虚委罪夷甫，言御史用法不端。伯阳怒，欲质让，若虚驰入自归帝。帝留若虚帘中。顷，伯阳等至，劾若虚傅中人失有罪，帝怒叱之，贬伯阳高要尉、权献杜阳尉，逐李晔岭南，流莹播州。”今按《毛若虚传》云：“乾元中，凤翔七坊士数剽州县间杀人，尉谢夷甫不胜怒，榜杀之。士妻诉李辅国，辅国请御史孙莹穷治，狱久不具，诏中丞崔伯阳与三司参讯，未决。乃使若虚按之，即归罪夷甫。伯阳争甚力，若虚慢拒，伯阳怒，若虚即驰入白于帝，诏姑出，若虚泥诉曰：‘若臣出即死。’因蔽若虚殿中，而召伯阳至，具劾若虚罔上。帝主先语，叱伯阳出，并官属悉贬岭外。”且《李岷传》云天兴令谢夷甫，而《毛若虚传》以为尉。《岷传》云中丞

、刑部大理为三司，而《若虚传》云，诏中丞崔伯阳与三司参讯。则中丞之外自有三司。《坎岷传》云，孙莹直夷甫，其妻又诉，诏三司参讯无异辞，妻不承。《若虚传》云，狱久不具，参讯未决，而若虚按之。《岷传》云，崔伯阳高要尉，权献、杜阳尉，李晔岭南，孙莹播州。《若虚传》云，官属悉贬岭外。此皆两传之不同者也。

《吴湊传》末云：“兄淑子士矩，开成初为江西观察使，飧宴侈纵，一日费凡十数万。初至，库钱二十七万。缙晚年才九万，军用单匱，无所仰。事闻，中外共申解，得以亲议，文宗弗穷治也，贬蔡州别驾。谏官执处其罪，不纳。于是御史中丞狄兼谟建言：‘陛下擢任士矩，非私也；士矩负陛下而治之，亦非私也。请遣御史至江西即讯，使杜江淮它镇循习意。’帝听，乃流端州。”今按《狄兼谟传》云：“江西观察使吴士矩加给其军，擅用上供钱数十万。兼谟劾奏：‘观察使为陛下守土宣国诏条，知临戎赏士，州有定数，而与夺由已，诒弊一方，为诸道缺望。请付有司治罪。’士矩由是贬蔡州别驾。”观二转载士矩所犯，固已不同，至于有司劾治贬责，次序各有未完。盖删修之际，未尝以二传参校，补足其事意也。

《高智周传》云：“智周所善义兴蒋子慎，有客尝视两人曰：‘高公位极人臣，而嗣少弱，蒋侯官不达，后且兴。’子慎终达安尉。其子曾往见智周，智周方贵，以女妻之，生子挺，历湖、延二州刺史。生子洌、涣，皆擢进士。洌为尚书左丞。涣，永泰初历鸿胪卿、日本使尝遗金帛不纳，惟取笈一番，为书以贻其副云。挺之卒，洌兄弟庐墓侧，植松柏千馀。涣终礼部尚书，封汝南公。洌子链，涣子铕，又有清白名，而高氏后无闻。”

今按《乔琳传》末云：“时又有蒋镇者，洌子也，与兄链俱以文辞显，擢贤良方正科，累转谏议大夫。大历中，淫雨坏河中盐池，味苦恶。韩滉判度支，虑减常赋，妄言池生瑞盐，王德之美祥。代宗疑不然，命镇驰驿按视。镇内欲结滉，故实其事，表置祠房，号池曰宝应灵庆云。再进工部侍郎。妹婿源溥者，休弟也，故镇与休交。泚叛，窜于鄆，伤足不能进。泚先得链，而镇左右逃归，语所在，源休闻，白泚，以二百骑求得之，知不免，怀刃将自刺，链止之。复谋出奔，懦不决中。朝臣遁伏者，休多所诛杀，赖镇救原十五。初，洌与弟涣在安、史时皆污伪官，链兄弟复屈节于贼云。”又按《朱泚传》云泚僭即皇帝位，以蒋镇为门下侍郎、同中书门下平章事。蒋链为御史中丞。又云泚自将逼奉天，以蒋链、李子平为宰相。然则蒋洌、涣兄弟，以《高智周传》言之，则皆良士可嘉者；在乔琳、朱泚传言之，则父子皆污伪官。

《孝友·李知本传》云：“知本，赵州元氏人，元魏洛州刺史灵六世孙。父孝端，仕隋为获嘉丞，与族弟太冲俱有世阀，而太冲官婚最高，乡人语曰：‘太冲无兄，孝端无弟。’”今按《李华传》云：“华字遐叔，赵州赞皇人。曾祖太冲，名冠宗族间，乡人语曰：‘太冲无兄’。太宗时擢祠部郎中。”然则此李太冲姓名、乡郡

、时世及里语皆同，则二传之太冲，实一人耳。今一传以为官婚最高而得称，一传以为名冠宗族而得称，二者使后世何所从也？况知本传既备载矣，《华传》复书之，可乎？

《薛存诚传》云：“存诚为御史中丞，江西监军高重昌妄劾信州刺史李位谋反，追付仗内诘状。存诚一日三表，请付位御史台，及案，果无实。”今按《孔戣传》云：“迁尚书左丞。信州刺史李位好黄老道，数祠祷。部将韦岳告位集方士图不轨。监军高仲谦上急变，捕位劾禁中。戣奏刺史有罪，不容系仗内，请付有司。诏还御史台，戣与三司杂治，无反状。岳坐诬罔诛，贬位建州司马，中人愈怒……”此李位一事，在《薛存诚传》，则云高重昌劾之，而存诚三表请付台，按之无实。在《孔戣传》，则云高仲谦上变，劾位禁中，而戣请付有司治之，无反状。二者未知孰是。

顺宗女襄阳公主，始封晋康县主，下嫁张孝忠子克礼。今按《张茂昭传》，克礼乃茂昭之子而孝忠之孙，且又云尚晋康郡主，非县主也。

《韦温传》云：“乐工尉迟璋授光州长史，温封上诏书。”今按《陈夷行传》云：“仙韶乐工部尉迟璋授王府率，右拾遗窦洵直当衙论奏，郑覃嗣复嫌以细故，谓洵直近名。夷行曰：‘谏官当衙，正须论宰相得失，彼贱工安足言者？然亦不可置不用。’帝即徙璋光州长史，以百缗赐洵直。”又按《曹确传》云：“文宗欲以乐工尉迟璋为王府率拾遗，洵直固争，卒授光州长史。”由是言之，则尉迟璋初授王府率，因洵直争之，遂下除光州长史矣。韦温何为犹封还诏书？无乃史误记乎？或者虽下除光州，而尚未厌公议，故温封还其诏，而朝廷遂已乎？事虽不可得而知，然要之《韦温传》所书，讫不见朝廷听否，此若非史笔之误，则其事之终始是非，必有所未尽，而后世不得不疑也。

《五行志》云：“浙西观察使王璠治润州城隍中得方石，有刻文曰：‘山有石，石有玉，玉有瑕，瑕即休。’”今按《璠本传》止云“山有石，石有玉，玉有瑕。”而已，无“瑕即休”三字。又曰：“术家云璠祖名崙，生础，础生璠，尽遐休。盖其应云。”然则史之为书，所以传信也。璠之石讖，正宣传信者也。虽复鄙俚隐晦，既载之以示后，则宜存其本文，岂可或增或损，以疑后世哉？就使有增损，而止一见乎书，使观者无它疑，犹为未可。况《志》、《传》皆载，而其文多寡复不同，使后世何所信乎？

《杜惊传》云：“惊为荆南节度使，黔南观察使秦匡谋讨蛮，兵败奔于惊。”今按《南蛮传》云：“坦绰寇成都，至新津而还，回寇黔中经略使秦匡谋惧，奔荆南。”在《杜惊传》则云“讨蛮贼而奔”，在《南蛮传》则云“蛮寇黔中，惧而奔。”则是未尝讨蛮。二者既不相符，且又观察、经略之名亦异。此二说必有非其实者。

《崔湜传》云：“进其外兄周利贞。”今按利贞，湜内兄也。未知孰是。

《刘晏传》末云：“包佶，字幼正，润州延陵人。父融，集贤院学士，与贺知章、张若虚有名，当时号吴中四士。佶擢进士第，累官谏议大夫，坐善元载，贬岭南，晏奏起为汴东两税使。晏罢，以佶充诸道盐铁轻货钱物使。迁刑部侍郎，改秘书监，封丹阳郡公。”今按《艺文志》云：“《包融诗》一卷【注云：润州延陵人】，历大理司直。二子，何、佶齐名，世称二包。何，字幼嗣，大历起居舍人。融与储光羲皆延陵人。曲阿有馀杭尉丁仙芝、缙氏主簿蔡隐丘、监察御史蔡希周，渭南尉蔡希寂、处士张彦雄、张潮，校书郎张晕、吏部常选周瑀，长洲尉谈戴。句容有忠王府仓曹参军殷遥、硖石主簿樊光、横阳主簿沈如筠；江宁有右拾遗孙处玄、处士徐延寿，丹徒有江都主簿马挺、武进尉申堂构十八人，皆有诗名。殷璠彙次其诗为《丹阳集》者。”然则融、佶既见于《刘晏传》末矣，今《艺文志》又言之，非重复欤？且又其间述。

《韦温传》云：“为给事中。王晏平罢灵武节度使，以马及铠仗自随，贬康州司户参军，厚赂贵近，浹日改抚州司马。温封上诏书。”今按《王晏平传》云：“以功检校常侍、灵盐节度使。父丧，擅取马四百、兵械七千，自卫归洛阳。御史劾之，有诏流康州，不即行，阴求援于河北三镇，三镇表其困，改抚州司马。给事中韦温、薛廷老、卢弘宣等还，诏不敢下，改永州司户参军，温固执，文宗谕而止。”以二传校之，一则云“贬康州司户，厚赂贵近”；一则云“流康州，求援河北三镇。”二者已自不同。且《温传》云：“改抚州司马，温封上诏书，而不言朝廷从否。”《晏平传》则云：“温等还，诏改永州司户，温固执，文宗谕而止。”此皆异同之甚者，未知其孰是。兼薛廷老、卢杞宣传，皆遗此一事，不载。

《苏味道传》云：“延载中，以凤阁舍人检校侍郎同凤阁鸾台平章事。证圣元年，与张锡俱坐法系司刑狱。锡虽下吏，气象自如，味道独席地饭蔬，为危惴可怜者。武后闻，放锡岭南，才降味道集州刺史。召为天官侍郎。圣历初。复以凤阁侍郎、同凤阁鸾台三品，更葬其亲……侵毁乡人墓田。萧至忠劾之。贬坊州刺史。”今按《张锡传》云：“锡，久视初，为凤阁侍郎，同凤阁鸾台平章事……坐泄禁中语，又赇谢巨万，时苏味道亦坐事，同被讯，系凤阁，俄徙司刑三品院。锡按辔专道，神气不慑，日膳丰鲜，无贬损。味道徒步赴逮，席地菜食。武后闻之，释味道，将斩锡，既而流循州。”

又《武后纪》云：延载元年【甲午】三月：“甲申，凤阁舍人苏味道为凤阁侍郎、同凤阁鸾台平章事。”；天册万岁元年【乙未】正月：“戊子，味道贬集州刺史。”；圣历元年【戊戌】九月：“辛巳，试天官侍郎苏味道为凤阁侍郎、同凤阁鸾台平章事。”久视元年【庚子】闰七月：“己丑，天官侍郎张锡为凤阁鸾台平章事。”；长安元年【辛丑】：“三月，流张锡于循州。”；“七月，苏味道按察幽平等州兵马。”；长安二年【壬寅】十月：“甲寅，苏味道同凤阁鸾台三品。”；长安

四年【甲辰】三月：“己亥，贬苏味道为坊州刺史。”以宰相表考之皆同。然则苏味道凡再为相，其初相以延载元年甲午岁，其贬集州以天册万岁元年乙未岁【是年先改为《证圣》，次改《天册万岁》】。方是时，张锡未为相也。至圣历元年戊戌岁，味道再入相，是时张锡亦尚未入。至久视元年庚子岁闰七月，张锡始为相，与味道共事。至长安元年辛丑岁，流锡于循州，此其大概也。今《味道传》乃云，证圣元年，与张锡俱坐法系司刑狱，武后放锡岭南，才降味道集州刺史，此大误也！

盖后之史臣吴兢、刘知几之后，追书其事，不知味道贬集州之因。但闻锡尝与味道同下狱，而锡以高抗不屈流窜，味道以慑惧自责获免，遂附会其事，以为坐此贬集州耳。殊不知当证圣之时，则张锡未为相也，味道贬集州，自有所坐也。与张锡同下狱，自是再入相之后，久视、长安之间，锡虽流窜，味道获免，未尝被责也。今试条陈之，且又为旁通图谱，列其岁次年号，及二人历官次序，庶览者昭然易见。所谓证圣之时，张锡未为相者。按《武后纪》及《宰相表》、《张锡传》并云，锡以久视元年始为相，此得其实也。而是年岁在庚子，其证圣元年岁在乙未，距庚子中间六年，其事殊不相属，此其一也。

所谓味道贬集州，自有所坐者。按《武后纪》及《宰相表》，延载元年九月壬寅，贬李昭德为南宾尉【昭德时自检校内史贬也。】次年天册万岁元年正月戊子，贬豆卢钦望为赵州刺史，韦巨源鄜州刺史，杜景佺溱州刺史，苏味道集州刺史，陆元方绥州刺史。此五人皆宰相也，而同时贬斥。今考其传，则四人所坐皆同。《豆卢钦望传》云：“李昭德被罪，有司劾奏，钦望阿顺昭德不执正，附臣罔君，贬赵州刺史。”《韦巨源传》云：“坐李昭德累，贬麟州刺史。”【麟即鄜字之误也，有说见别篇。】《杜景佺传》云：“会李昭德下狱，景佺苦申救，后以为面欺，左迁溱州刺史。”《陆元方传》云：“坐附会李昭德，贬绥州刺史。”此五人既同时为相，同时贬斥，而四人所坐，皆以昭德，则味道所坐，不言可知。由是言之，则味道集州之贬，本坐李昭德之故，而张锡奚预焉？此其二也。

所谓与张锡同下狱，乃再入相之后，久视、长安之间，又独得释免，未尝被责者。按《武后纪》及《宰相表》，久视元年，锡始为相，时味道亦同为相。至长安元年三月，锡流循州，而味道一无贬责。且锡本传亦云：“武后闻之，释味道。”而又是年七月，味道方奉使幽、平，亦足以验其未尝被责。此其三也。

然则味道此传，止以证圣元年与张锡下狱一事失其实，则其余考于纪传，遂皆参错，不能符合，宜后人之疑惑。今若差次其事，当云：“证圣元年，有司劾味道与豆卢钦望等附会李昭德，坐贬集州刺史，召为试天官侍郎。圣历初，复以凤阁侍郎、同凤阁鸾台平章事。长安初，与张锡俱坐法，系司刑狱。锡虽下吏，气象自如，味道独席地饭蔬，为危惴可怜者。武后闻之，将斩锡，既而流循州，释味道。是岁，奉使幽平等州，按察兵马。”（图表略）

《吴凑传》云：“贞元十四年夏，大旱，谷贵，人流亡。帝以过京兆尹韩皋罢之，即召凑代皋。”今按《韩皋传》云：“拜京兆尹，奏署郑铎为仓曹参军。铎苛敛，吏乃说皋，悉索府中杂钱，折余粟麦三十万石，献于帝。皋悦之，奏为兴平令。贞元十四年，大旱，民请蠲租赋，皋府帑已空，内忧恐，奏不敢实。会中人出入，百姓遮道诉之。事闻，贬抚州员外司马。”由此言之，则皋之为京兆，无政之甚者。而《吴凑传》所云，乃似皋本无过，而德宗以之为过，其意殊与《皋传》不同。书法如是，可乎？

《本纪》长寿元年：“五月，杀冬官尚书苏干。”今按《干传》云：“迁冬官尚书，来俊臣素忌之，诬干与琅琊王冲通书，系狱，发愤卒。”与纪不同，未知孰是。

《武延秀传》云：“韦后败，尚与主居禁中，同斩肃章门。”今按《安乐公主传》云：“临淄王诛韦庶人，主方览镜作眉，闻乱，走至右延明门，兵及斩其首。”二说不同，未知孰是。

《许景先传》云：“张说曰：‘许舍人之文，虽乏峻峰激流，然词旨丰美，得中和之气。’”今按王勃、骆宾王传，后张说论文处云：“许景先如丰肌腻理，虽秾华可爱，而乏风骨。”与本传所载不同，未知孰是。

《吴凑传》云：“元载赐死，于是王缙、杨炎、王昂、韩会、包佶等皆当坐。凑建言：‘法有首从，从不应死。一用极刑，亏德伤仁。’缙等由是得减死。”今按《刘晏传》云：“元载得罪，诏晏鞫之。晏畏载党盛，不敢独讯，更敕李涵等五人与晏杂治。王缙得免死，晏请之也。”又《王缙传》云：“缙败，刘晏等鞫其罪，同载论死。晏曰：‘重刑再覆，有国常典，况大臣乎！法有首从，不容俱死。’于是以闻。上悯其耄，不加刑，乃贬括州刺史。”由是言之，王缙以下以从坐免死，乃刘晏之请也。今《吴凑传》止以为凑言，则误矣。盖当时晏、凑皆各有言，但史之所叙不完尔。

《刘悟传》云：“与监军刘承偕不叶，众辱悟，纵其下乱法，悟不堪其忍。承偕与都将张问谋转悟送京师，以问代节度事。悟知之，以兵围监军，杀小使，其属贾直言质责悟曰：‘李司空死有知，使公所为至此，军中将复有如公者矣。’悟遽谢曰：‘吾不欲闻李司空字，少选当定，即搆兵退，匿承偕，囚之，’帝重违其心，贬承偕。然悟自是颇专肆，上书言多不恭，天下负罪亡命者多归之，强列其冤。”

今按《贾直言传》云：“监军刘承偕与悟不平，阴与慈州刺史张汶谋转悟送阙下，以汶代节度。事泄，悟以兵围承偕，杀小使。直言遽入责曰：‘司空纵兵胁天子使者，是欲效李司空邪？它日后复为军中所指笑。’悟闻感悔，匿承偕于第以免。悟每有过，必争，故悟能以臣节光明于朝。”且在《刘悟传》则言其自是专肆，上书

不恭，强列负罪者冤。在《直言传》，则云悟能以臣节光明，在《悟传》以为都将张问。《直言传》则云慈州刺史张汶，而又质责应答之词皆不同，览者莫知所从。此盖未尝以两传互相考究，但各就本传直加笔削，故舛谬至是。

《文宗本纪》太和七年三月：“辛卯，幽州卢龙军节度使杨志诚，执春衣使边奉鸾、送奚契丹使尹士恭。”今按《杨志诚传》云：“志诚果怨望，军有嫚言，囚中人魏宝义及它使焦奉鸾、尹士恭。”与纪异同，未知孰是。

卷13

《安乐公主传》云：“临淄王诛韦庶人，主方览镜作眉，闻乱，走至右延明门，兵及，斩其首，追贬为悖逆庶人。”今案《玄宗纪》云：“乃夜率刘幽求等入苑中，玄宗率摠、监羽林兵会两仪殿，梓宫宿卫兵皆起应之，遂诛韦氏。”又《韦氏传》云：“俄而临淄王引兵夜破玄武门。”又《刘幽求传》云：“临淄王入诛韦庶人，预参大策。是夜号令诏敕，一出其手。”然则玄宗之起事在夜，而公主方览镜作眉，何为哉？斯必妄也。设使其事诚然，尚不足书，而况于妄乎？

《林蕴传》云：“蕴辨给。尝有姓崔者矜氏族，蕴折之曰：‘崔杼弑齐君。’林放问：‘礼之本优劣何如邪？’其人俯首不能对。”今案凡史之所纪，必系乎兴亡治乱，礼乐政刑，褒贬劝惩，贤愚邪正，有益于名教，有考于后人，则虽多书而无害。若安乐公主览镜作眉林蕴矜氏族之类，虽连编累牍书之，何补于事乎？是徒污简策而贻讥诮也。

《令狐德棻》传云宜州华原人。今案《地理志》，华原乃京兆府之属县也。其注云：“义宁二年，以华原、宜君、同官置宜君郡，并置土门县以隶之。武德元年，曰宜州。贞观十七年州废，省宜君、土门，以华原、同官隶雍州。”然则宜州虽尝暂置数年，然终于废省，则其名不当复存，当曰雍州，或京兆华原人可也。

《杜审权传》云：“或昼日少息，则顾直，将解帘，即旁无人，自起彻钩，手拥帘徐下乃退。”今案此亦人之间居燕处常事末节，又何足载于史乎？

《高智周传》末：“蒋洌父挺之卒，洌兄弟庐墓侧，植松柏千馀。”今案丘墓之植松柏，亦足纪欤，若其以多为贵，则又非所闻也。

《姚崇传》云：“况木积年，而木自当蠹乎？”今案此一句中当有“刊脩”之字，不当冗长如此也。

《严绶传》载其未贵时，干李逵而逵不礼。既显后，逵谒绶而绶不礼，以报之之事，首末凡百馀字，何预于兴亡治乱而载之欤？

《宋之问传》后叙之繇为刺史教歌婢事。今案此于兴亡治乱何所损益而记之邪。

《韩滉传》云：“自始仕至将相，乘五马无不终枥下。”《李岩传》云：“为参军时，制一裘服终身。”文多不录。今案史之为书，如此等事，亦当记邪？

《五王赞》云：“五王提卫兵，中兴唐室，不淹辰，其谋深矣。至不尽诛诸武，使天子藉以为威，何其浅邪！衅牙一启，为艳后竖儿所乘，无亦神夺其明，厚韦氏毒

，以兴先天之业乎？不然，安李之功贤于汉平勃逵矣。”今案所谓不然，安李之功贤于汉平勃，其“不”字可削也。

《宰相表》：“贞观九年七月辛巳，恭仁罢为雍牧。”今案《宰相表》，杨恭仁以武德二年自黄门侍郎凉州总管遥领纳言，六年四月入为吏部尚书，兼中书令，检校凉州诸军事，至九年七月罢。自后表内不见复入为何官，至此忽有此罢为雍州牧一事。且案恭仁本传，止有武德末拜雍州牧，而无贞观九年为雍州牧事。然则此九年七月罢者，乃武德九年七月罢，而贞观九年七月恭仁罢一事，本无之，乃误书也。况《本纪》内亦不书，即可见宰相表误剩此一事可削也。

卷15

《本纪》云：“中宗太和大圣大昭孝皇帝讳显，高宗第七子也。母曰则天顺圣皇后武氏。高宗崩，以皇太子即皇帝位。”今案诸帝纪，初必书其始封或迁徙、改名、进爵及历官次序等事，然后乃记即位。而中宗自高宗时封周王，又徙英王，改名哲，武后时复名显之类，以诸帝纪例，皆宜备书，今乃略而不述，未知其故。

《太宗纪》贞观二年正月：“癸丑，吐谷浑寇岷州，都督李道彦败之”；八年十二月：“辛丑，特进李靖为西海道行军大总管、胶东郡公道彦为赤水道行军总管，以伐吐谷浑”；十二年十一月：“己巳，明州山獠反，交州都督李道彦败之”今案道彦，即淮安王神通之子，故八年为赤水道总管时纪不书姓。然二年、十二年则又皆书姓，何也？

《长孙无忌传》云：“太宗曰：‘朕当评公等可否以相规。谓高士廉心术警悟，临难不易节，所乏者骨鲠耳。唐俭有辞，善和解人，酒杯流行，发言可憇，事朕二十年，未尝一言国家事。杨师道性谨审，自能无过，而懦不更事，缓急非可倚。岑文本敦厚，文章论议，其所长也。谋略经远，自当不负于物；刘洎坚正，其言有益，不轻然诺于人，能自补阙。马周敏锐而正，评裁人物，直道而行，所任皆称朕意。褚遂良鲠亮有学术，竭诚亲于朕，若飞鸟依人，自加怜爱。无忌应对机敏，善避嫌求，于古人，未有其比。总兵攻战，非所善也。’”今案太宗所评诸人短长，惟杨师道一人载入本传，然亦有不同。其外诸人皆不见于本传，未审当载之欤？不当载欤？此亦义例之不明者也。

《哀帝纪》云：“母曰皇太后何氏。”又《昭宗十七子传》云：“积善皇后生裕及哀皇帝。”今案《后妃传》，凡所生必书曰，生某宗、某王、某公。独《何皇后传》不书其生德王裕及哀帝，不审其义例何谓也。

《太宗纪》云：“贞观元年六月辛丑，封德彝薨。”又《公主传》云：“中宗女定安公主嫁太府卿崔铤，主薨。”又《崔祐甫传》云：“是岁，被疾薨，年六十。”今案《封德彝传》云：“贞观元年，遭疾卧尚书省，帝亲临视，命尚辇送还第，卒，年六十。”又《崔行功传》末云：“孙铤尚定安公主，卒，崔祐甫病，及卒。”然则封德彝在本纪则书薨，在本传则书卒。定安公主，在本传则书“薨”，在《崔铤传》则书卒，崔祐甫在本传则书薨，在其子传则书卒，不知其义例谓何。《新书》之内，此比甚多，不可遽数，今但略举其一二，以见其书法之驳杂难明也。

《三宗诸子传》云：“中宗四子，韦庶人重润，后宫生重福、重俊、殇帝。”今案《新书》，凡列帝诸子，间有史失其传者，亦必标其名而著其遗逸无传之因，不直尔晦其名也。今此所谓殇帝者，乃重茂也。始封北海郡王，神龙初，进封温王。中宗崩，韦后矫遗诏立之为皇太子，遂即皇帝位。既而临淄王以兵讨乱，韦氏败，睿

宗即位，复封为温王。景云二年正月，徙封襄王。开元二年七月丁未薨，追册为殇帝。重茂之立凡二十馀日，比于诸王事亦稍殊。若以前史昌邑王、北乡侯例推之，其始封进爵及平生事迹，则宜列之为传。其即位后所行之事，则当编之于中宗、睿宗之纪。今此《传》但记“殇帝”二字，其余则皆略而不述，亦不显其名，及隐晦无传之因，返更不若列帝诸子之失传者，使后世览者莫知殇帝之为谁，此又书法之不可晓者也。

《姚南仲传》云：“大历十年，独孤皇后崩。”今案《本纪》大历十年十月：“丙寅，贵妃独孤氏薨。丁卯，追册为皇后。”《后妃传》所载亦同。然则独孤氏当薨时止贵妃耳，安得遂书为崩？此盖不惟义例之不明，盖未尝考其位号先后而书也。

《太宗本纪》：“贞观十七年正月戊辰，魏徵薨。”今案《新书》例，《本纪》惟书宰相，而它官不书。今据《宰相表》，征以十六年九月丁巳罢为太子太师矣，故于十七年正月表内更不书此征薨一节，盖谓非宰相故也。而本纪十六年九月不书征罢至十七年薨，则是尚以为宰相乎？若尚以为宰相当书，则表内不当记云“罢为太子太师”，至十七年正月，犹当书其薨于表。如此，则于义方允，于例为合。若以为已罢宰相不当书，则《本纪》内当记其十六年罢为太子太师，而十七年则不当更载其薨也。此一事，进退皆无所据，依《纪》《表》二者，必有一误矣。

卷16

《郭正一传》载，正一永隆中为平章事，永淳中迁官等事次乃云：“刘审礼与吐蕃战青海，大败，高宗召群臣问所以制戎，正一曰……”云云。〈文多不录〉刘齐贤、皇甫文亮等议，亦与正一合，帝纳之。今案《高宗纪》，仪凤三年〈岁在戊寅〉九月丙寅，李敬玄、刘审礼及吐蕃战于青海，败绩，审礼死之。又永隆元年〈岁在庚辰〉，正一为平章事。永淳元年〈岁在壬午〉，正一迁官，而刘齐贤亦以是年十月方为平章事，其皇甫文亮亦非同时为相之人。由是而言，则审礼败死在永隆、永淳之前，相去颇远。而正一、齐贤此对，乃未为相时事，非为相后所言，其证甚明。今书于永隆、永淳之后，失其次序矣。

《仆固怀恩传》云：“于是雍王以元帅为中军，拜怀恩同中书门下平章事为之副。”时诸节度皆以兵会次黄水。〈黄即横字之误〉今案《代宗纪》，宝应二年十月辛酉，雍王适讨史朝义。甲戌，败史朝义于横水。十一月，仆固怀恩为朔方河北副元帅。在《本纪》则怀恩先破贼后为副元帅，在《传》则先为副元帅而后破贼。二者未知孰是。

《卢坦传》云：“坦为中丞，时帝罢诸道长吏代还进奉，既而乃述有司毁李锜祖墓，坦上疏谏止之事。”今案《宪宗纪》，元和二年十二月甲申，李锜伏诛。三年正月癸巳，大赦，罢诸道受代进奉钱。其次序自如此，而《坦传》失之矣。

《蒋乂传》云：“贞元九年，擢右拾遗、史馆修撰。德宗重其职，先召见延英，乃命之。张孝忠子茂宗，尚义章公主，母亡，遗言丐成礼。帝念孝忠功，即日召为左卫将军，许主下降。乂上疏，以为墨绶礼，本缘金革，未有夺丧尚主者，缪盪典礼，违人情，不可为法。”今案《张孝忠传》云：“贞元二年，河北蝗，民饿死如积。孝忠与其下同粗淡，日膳裁豆脯而已。人服其俭，推为贤将。明年，检校司空，诏其子尚义章公主。孝忠遣妻入朝，执亲迎礼，赏赉甚厚。五年，为将佐所惑，以兵袭蔚州，入之。”然则《孝忠传》所记年次甚明，其茂宗尚主及亲迎成礼，殆止在贞元三年、四年之间尔。《蒋乂传》则载之贞元九年之后，失其序矣。

《元载传》云：“大历八年，吐蕃寇邠宁，议者谓三辅已西，无襟带之固。”于是载议河陇利害，既而叙载僭越不法等事，然后云会李少良上书，诋其丑状。载怒，奏杀少良，道路目语，不敢复议。今案《代宗纪》，大历六年五月，杀李少良。今此传先述八年吐蕃事，后述李少良事，则失其序矣。

《五行志·第二十四》记贞元十三年、十九年火事，然后记二年七月洪州火事，此亦记录之失序也。

《柳浑传》云：“本名载。朱泚乱，浑匿终南山，羸服步至奉天，贼平，乃更今名

。贞元元年，迁兵部侍郎，封宜城县伯。李希烈据淮、蔡，闕播用李元平守汝州，浑曰：‘是夫炫玉而贾石者也。往必见禽，何贼之攘？’既而果为贼缚。三年，以本官同中书门下平章事。”今案《本纪》建中四年〈是岁癸亥〉正月庚寅，李希烈陷汝州，执刺史李元平。十月，泾原节度使姚令言反，犯京师。戊申，如奉天。朱泚反。兴元元年〈甲子〉六月，姚令言、朱泚伏诛。贞元元年〈乙丑〉，二年〈丙寅〉，三年〈丁卯〉正月，兵部侍郎柳浑同中书门下平章事。又案《闕播传》叙播用李元平守汝，为李希烈所缚，然后述从幸奉天事。然则元平失守，在朱泚反之前久矣。今《浑传》则先叙朱泚建中四年十月反事，又及贞元元年事，然后述建中四年正月已前用李元平事，此失其序矣。

卷18

《路岩传》云：“岩为剑南西川节度使，承蛮盗边后，岩力拊循，置定边军于邛州，扼大度，治故關，取坛丁子弟教击刺，使补屯籍。由是西山八国来朝，以劳迁兼中书令，封魏国公。”今案《南蛮传》云：“初，李师望建言：‘成都经总蛮事，旷日不能决，请析邛、蜀、嘉、眉、黎、雅、嵩七州为定边军，建节度，制机事近且速。’天子喟然，即诏师望为节度使，治邛州。”邛距成都才五舍，嵩州最南，去邛乃千里，缓急首尾不相副，而师望利专制，讳不言。此二《传》言定边军利害自不同，而各载之，使后世何以取信欤？

《宗室传》赞云：“唐兴，疏属毕王，至太宗，稍稍降封。时天下已定，帝与名臣萧瑀等喟然讲封建事，欲与三代比隆。而魏徵、李百药皆谓不然。百药称帝王自有天命，历祚之短长，不缘封建。若乃百药推天命，乃臆论也。”今案此赞意，盖短百药，以为国祚短长，本诸天命，不在乎封建之与郡县。以为臆论，不足取也。然至于《十一宗》诸子赞，则曰：“历数短长。自有底止。彼汉七国。晋八王。不得其效。愈速祸云。”斯言也。亦何异于百药之论欤。

《李诉传》赞曰：“平蔡功，诉为多。”今案《李光颜传》赞曰：“世皆谓李诉提孤旅入蔡缚贼为奇功，殊未知光颜于平蔡为多也。”此二人平蔡之功皆为多，则与夺果安在乎？

《韩皋传》云：“皋资质重厚，有大臣器。”今案《皋本传》，皋为京尹，而用小人，言掊斂亟进，以希时邀宠，及百姓以旱灾受弊，则喑嘿不言。德宗，庸暗之主也，犹知其非而逐之于外。今史氏乃以为有大臣器，则古之以道事君者，固如是乎？

《韩全义传》云：“全义讨蔡无功，班师过阙下，托疾不入谒，卒不见天子。去时恨帝失政，使奸人得自肆，云宪宗在藩，疾之。既嗣位，全义大惧，愿入覲，不复用，以太子少保致仕卒。”今案《杜黄裳传》云：“于是夏绥银节度使韩全义憊佞无功，因其来朝，白罢之。”以《全义传》言之，则是宪宗素已疾全义之奸妄，虽不因黄裳之白，亦必罢去，而《黄裳传》则又全归功于黄裳，而隐宪宗之疾恶，明断史笔，与夺岂当如是乎？

《裴垕传》云：“严绶守太原，政一出监军李辅光，垕劾其懦，以李鄴代之。”今案《严绶传》云：“绶为河东节度使，在镇九年，尚寬惠，治称流闻，士马孳息，入为尚书右仆射。”然则绶治太原，在本传则为有治迹可取，在《裴垕传》则为无治状而可罪。二者是非孰在乎？

卷19

《文德皇后传》云：“从幸九成宫，方属疾，会柴绍等急变闻，帝甲而起，后舆疾以从。”今案《帝纪》并《柴绍传》，并未尝有急变之事，莫知何谓，疑其无之。

《宜城公主传》略云：“主嫁裴巽，帝恚，斥为郡主，久之复故，封于神龙元年”今案中宗自未改神龙，未反正已前，止称太子，神龙元年始复帝位。今传云“帝恚，斥为郡主久之复故”则是神龙元年以前明矣。神龙以前，曷尝有帝，所称者何帝乎。

《段文昌传》云：“南诏袭南安，帝以文昌得蛮夷心，诏使下檄尉让，即日解而去。”今案文昌传以本纪及南蛮传考之，自太和四年已后至九年，并无南诏寇南安，因得文昌檄而解去之事，且南安不见属何郡，疑皆无之。

《宰相世系表》云：“安定牛氏出自汉陇西主簿崇之后”〈辽允后周工部尚书临淮公弘弘隋吏部尚书奇章公〉今案《隋书·牛弘传》云：“安定鹑觚人也，本姓寮氏。祖炽，郡正中。父允，魏侍中工部尚书、临泾公，赐姓为牛氏”然则是本姓寮，而弘父名允，赐姓为牛。今此表乃云辽允是，遂以辽允为名，又云出陇西主簿崇之后，则其得姓甚远，与隋书殊为差舛。然古之牛氏实安定人，故允封临泾亦不出其地，今此表则云临淮，又亦可疑。且若弘之世系果出鹑觚，则当日弘所封亦应不出安定、临泾之境，今乃远取奇章，似必有说。况近世史氏记人之乡里多非其真，如李则陇西、王则太原、姚则吴兴之类，昔人已尝讥其失。今此牛氏世表恐亦同之，兼案集韵寮字自是人姓，音聊，而隋书乃唐初所修，去隋未远，所修之人多隋时人，其所载述必得其详，恐此世表后人所撰不知源本，妄相附着云尔。

《武后纪》：“桓彦范、敬晖等诛二张，复中宗处，其人名内有库部员外郎朱敬则。”今案《敬则传》，敬则当武后世已尝为相，罢后为成均祭酒、冬官侍郎、郑州刺史致仕，且未尝为库部员外郎，而本传亦不言其同诛二张。虽有与敬晖密议诛之之策，然传亦止云晖卒用其策，亦不言敬则同临其事也。疑此一名误载。

《蒋乂传》云：“张孝忠子茂宗尚义章公主，母亡，遗言丐成礼。帝念孝忠功，即日召为左卫将军，许主下降。乂上疏，以为：‘墨缌礼本缘金革，未有夺丧尚主者，缪盩典礼，违人情，不可为法’。帝令中使者谕茂宗之母之请，乂意殊坚。帝曰：‘卿所言，古礼也。今俗借吉而婚不为少’。对曰：‘俚室穷人子，旁无至亲，乃有借吉以嫁，不闻男冒凶而娶。陛下建中诏书，郡县主当婚，皆使有司循典故，无用俗仪。公主春秋少，待年不为晚，请茂宗如礼便’。帝曰：‘更思之’。会太常博士韦彤、裴堪谏曰：‘婚礼，主人几筵听命，称事立文，谓之嘉，所以承宗庙，继后嗣也。丧礼创巨者日久，痛甚者愈迟，二十五月而毕，谓之凶，所以送死报

终，示有节也。故夫义妇德，父慈子孝。昔鲁侯改服，晋襄墨缘金，革事则有权变，安有释缘服，衣冕裳，去巫室，行亲迎，以凶渎？嘉为朝廷爽法’。疏入，帝迂其言，促行前诏，然心嘉义。”

今案《张孝忠传》云：“贞元二年，河北蝗。明年，检校司空诏其子茂宗尚义章公主。孝忠遣妻入朝，执亲迎礼，赏赉甚厚”。然则既云孝忠遣妻入朝，则是茂宗之母尚在，安得复有在丧之说欤？且又云：“茂宗母亡，遗言丐成礼”。则是入朝者，孝忠之后妻，而茂宗之后母乎？且观传之所叙，似孝忠之妻将亡，而有遗言，丐速成礼，故德宗从之。则其人之亡，固未久也。而孝忠已娶后妻，可乎？朝廷亦以妻待之，礼欤，史官亦以妻书之，可乎？凡此者，皆史氏不明白其事，未免后人之惑也。

古之封一字王皆国名，至唐则有以州名者，若延王、通王、沂王、韶王、彭王之类是也，而其内有封覃王者，不知此国名邪？州名邪？或覃之误耶？若是州名，亦莫知其何在也。

《譙王重福传》云：‘趋东都，舍驸马裴巽家。’今案唐驸马都尉裴巽有二，其一尚中宗女宜城公主，其一尚睿宗女薛国公主。今重福所舍之裴巽，其宜城欤薛国欤不可得而知。然意者重福即中宗子，今既作乱，必趋其所亲姊妹之家，然则无乃宜城之裴巽是邪？史不明言，特以意度之尔。且又薛国初嫁王守一，守一以开元十二年死，后始再嫁裴巽。以是言之，则宜城之裴必矣。然则裴巽者，一时果有二人邪？或薛国之巽，即宜城之巽邪？皆不可得知。然此亦史氏之所宜辨析者，故载之云。

《贾至传》云：“至德中，将军王去荣杀富平令。肃宗新得陕，且惜去荣材，诏贷死。至谏，或曰：‘去荣善守陕，新下，非去荣不可守。臣谓不然，李光弼守太原，程千里守上党，许叔冀守灵昌，鲁炆守南阳，贾贲守雍丘，张巡守睢阳，初无去荣，未闻贼能下也。’”今案《肃宗纪》至德二载：“八月，灵昌郡太守许叔冀奔于彭城。九月丁丑，安庆绪陷上党郡，执节度使程千里。癸卯，复京师，庆绪奔于陕郡。十月戊申，广平郡王俶及安庆绪战于新店，败之，克陕郡。”；又“鲁炆保南阳，被围凡一年，昼夜战，人至相食，卒无救。至德二载五月，乃率众突围走襄阳。”由是言之，鲁炆以二载五月弃南阳，贾贲以至德元载死于雍丘，而张巡代守，许叔冀以八月弃灵昌，程千里以九月失上党，至十月，肃宗乃得陕而去。荣杀人，又得陕之后，则数子者或死或失守，皆已在得陕之前，而贾至犹有此言，无乃谬乎？且至实当时朝臣也，凡诸将得失，无容不知，而谬误至此，深可疑也。

《柳浑传》：“浑为张延赏所挤，罢相。”今案延赏与浑在贞元三年，同时为相。是年延赏以七月壬申薨，浑以八月己丑始罢。然则其罢非缘延赏所挤，此其一也。又按《延赏传》，以病困不能事，其所建请减吏员事尚不能主之而死，何暇复挤柳

浑乎？此其二也。由是言之，延赏挤浑之言，其殆妄乎？

《王维传》云：‘缙为蜀州刺史未还，维自表“已有五短，缙有五长，臣在省户，缙远方，愿归所任官，放田里，使缙还京师’。议者不之罪。久乃召缙为左散骑常侍。”今案《缙传》云：“禄山乱，擢太原少尹，佐李光弼，以功加宪部侍郎，迁兵部。史朝义平，诏宣慰河北，使还有指，俄拜黄门侍郎，同中书门下平章事。”则缙未尝历为蜀州及常侍，此可疑者一也。又《缙传》云：“禄山乱，擢太原少尹，佐李光弼，以功加宪部侍郎，迁兵部。史朝义平，诏宣慰河北。”而《维传》云：“维以上元初卒。”今案禄山以天宝十四载作乱（是岁乙未），与其子庆绪及史思明及其子朝义相继叛逆。至代宗广德元年而朝义平。中间历天宝十五载（丙申），至德二载（丁酉），乾元元年（戊戌），二年（己亥），上元元年（庚子），二年（辛丑），宝应元年（壬寅），广德元年（癸卯）。是年春，史朝义死，缙宣慰河北。是时维之卒已久矣。自丙申至庚子，五六年之间，缙未尝有入蜀及为常侍之事。此可疑者二也。又《维传》云：“禄山反，维为贼得，迫为给事中。贼平，皆下狱。时缙位已显，请削官赎维罪。肃宗亦自怜之，下迁太子中允。久之，迁中庶子，三迁尚书右丞。”今案安禄山以天宝十五载（丙申）六月陷京师，至至德二载（丁酉）九月复京师，十月复东京。凡陷贼官下狱，当在此际。方是时，缙官位已显，则何由复有为蜀州刺史等事？此可疑者三也。由是言之，《维传》所言，殆皆无之。

《宰相表》武德四年四月癸酉，寂为左仆射。至六年又云四月癸酉，寂为左仆射。（即裴寂也）今案《本纪》武德四年四月，不书寂为左仆射，至六年则书，此一可疑也。又自四年寂为左仆射之后，中间不载迁改罢免，无缘于六年再为左仆射，此二可疑也。又寂本传止述自右仆射迁左，虽不载其年，然亦不述其两为左仆射，此三可疑也。又案《五行志》武德四年八月丙戌朔日食，今以八月丙戌朔却而推之，则是年四月内无癸酉日。而六年十二月壬寅朔日食。以十二月壬寅朔却而推之，则是年四月内有癸酉日。此四可疑也。由是言之，四年四月癸酉，寂为仆射。疑其误书本无此一事也。

《崔彦昭传》云：“伶人李可及为懿宗所宠，横甚，彦昭奏逐，死岭南。”

今案《彦昭传》，彦昭，懿宗时为户部侍郎，由河阳节度使徙河东。僖宗立，授兵部侍郎、诸道盐铁转运使，俄同中书门下平章事。又案《僖宗本纪》，彦昭以乾符元年八月始为相，时僖宗已即位期年矣。又案《曹确传》云：“懿宗咸通中，确为相时，帝宠优人李可及。可及凭恩横甚，人无敢斥，擢为威武将军。确谏，帝不听。至僖宗立，始贬死。”方懿宗宠可及势盛之时，曹确以宰相言之尚不纳，而彦昭是时又非宰相，何由一言而可及遂贬死？此可疑者一也。况《确传》云僖宗立，可及始贬死，而《彦昭传》则云彦昭奏逐死岭南。即未审彦昭以懿宗时言邪？以僖宗时言邪？若以懿宗时言，则曹确以宰相言之尚不从，而彦昭身非言事之官，又无评

弹之职，何由一言便逐？若以为当僖宗时言之遂逐，则当懿宗时，可及已为众人所憎，《确传》已具载其事，岂容僖宗即位之后，曹确返无一言，直候期年之后，彦昭为相，言之然后贬逐乎？此可疑者二也。然则《彦昭传》所书，殆皆妄诞可疑也。

○

跋

《新唐书纠谬》二十卷、《五代史纂误》五卷，此二书皆元祐中故朝请大夫吴君缜所撰，君字廷珍，成都人，熙丰时名公师孟之子，历数郡守，俱以惠政闻。生平力学，博通古今，多求前史谬误而参订之，然未尝示人，间有传者，此二书而已。今直宝文阁宇文公时中，自蜀来守吴兴，以郡庠有《新唐书》、《五代史》版本，而吴君此书不可不附见也，遂令并刻之，且俾元美序其后。元美曰唐人称杜征南、颜秘书为左丘明、班孟坚忠臣，今观其推广发明二子，信有功矣！至班、左语意乖戾处，往往曲为说以附会之，安在其为忠也；今吴君于欧、宋大手笔，乃能纠谬纂误，力裨前阙，殆晏子所谓献可替否，和而不同者，此其忠何如哉！然则唐人之论忠也，陋矣！惜乎君之志，徒见于其书也。

绍兴戊午四月望，左从政郎、充湖州州学教授，长乐吴元美跋后